



## Aningaasanut Nunallu allanut Naalakkersuisoq

### **Tallimangornermi 22. maj 2009-mi Aningaasaqarnermut ataatsimiititaliap aalajanger- nera pillugu ilisimatitsissut - Suliaq nr. 01.31.06/09-00412**

#### **Puisit amiinik pisiortornerup matoqqatinneqarnerata ilaannakortumik tamakkiisumil- luunniit atorunnaarsinneqarsinnaanera**

Naalakkersuisut **inassutigaa**,

Kontomi pingaarnermi 51.02.03-mi, Puisit amiinik tunisinermi tapiissutinut tunngasumi, aningaasaliissutit 3.627.000 koruunik amerlineqassasut,

Kontomi pingaarnermi 20.11.50-imi, Ingerlatsinermut sillimmatinut tunngasumi, aningaasaliissutit 3.627.000 koruuninik ikilineqassasut.

#### **Aningaasaqarnermut ataatsimiititaliap oqaaseqaatai**

Suliaq pillugu Aningaasaqarnermut ataatsimiititaliami amerlanerussuteqartoqarlunilu ikinnerussuteqartoqarpoq.

Aningaasaqarnermut ataatsimiititaliami amerlanerussuteqartut Atassummit, Inuit Ataqtigiinnit aamma Demokraatinit inuttaqartut qinnuteqaatip suliarineqarnissaanut periarfissamik nassaarsinnaanngillat. Taamaalilluni qinnuteqaammi siunertarineqartumut itigartitsitsisoqarnanilu allatulluunniit isummertoqanngilaq. Taamaattorli ataatsimiititaliamit nalilerneqarpoq piffissami matumani Inatsisartunik qinersinissap nalunaarutigereernerani suliap ingerlanneqarnissaanut inatsisitigut isumannaatumik naammattumik tunngavissaqanngitsoq. Tamatumunnga atatillugu ataatsimiititaliami amerlanerussuteqartut Naalakkersuisuugallartuni taamatuttaa Aningaasaqarnermut ataatsimiititaliaagallartumi suliaqarfinnik ingerlatsinermut pisortatigoortumik pingaarnertullu killiliinerit immikkut isiginiarneqarput. Ataatsimiititaliami amerlanerussuteqartut tamatuma saniatigut naliliippat naalakkersuinikkut ingerlatserpalaatumik aningaasaliinissamat qinnuteqaatip piffissami matumani akuerineqarnera naleqqut-tuunngitsumik siunissami aalajangiisarnissamat tunngaviliisinnaasoq. Kiisalu Ataatsimiititaliami amerlanerussuteqartut naliliippat aningaasaliissutissatut qinnuteqarnermi maanna Inatsisartuusut sulinissamat atuuffiat qaangiutereersimasoq.

Tamanna tunuliaqutaralugu Ataatsimiititaliami amerlanerussuteqartut qinnuteqaatip Inatsisartunngortussani suliarineqarnissaa innersuussutigaa.

Aningaasaqarnermut ataatsimiititaliami ikinnerussuteqartut Siumumit inuttaqartut qinnuteqaat pillugu imikkut ima oqaaseqaateqassapput:

Aningaasaqarnermut ataatsimiititaliami amerlanerussuteqartut Inuit Ataqtigiinnit, Atassummit aamma Demokraatinit inuttaqartut puisit amiinik pisiortornerup ammaqqinnissaanut Naalakkersuisut qinnuteqaataata suliarineqannginnissaa ullumikkut aalajangerpaat. Aalajangerneq tamanna Siumumit akuersaarneqarsinnaanngilluinnarpoq. Siumumit ilaasortaatitaasut tamanna pissutigalugu Aningaasaqarnermut ataatsimiititaliap ullumikkut tallimangornermi

22. maj 2009-mi ataatsimiinnerani suliap ingerlanneqarnissaa pillugu kimigiiserput kinguneqanngitsumilli

Aningaasaqarnermut ataatsimiititaliami amerlanerussuteqartut suliap suliarineqannginnissaanut aalajangererat piniartunut piniartullu ilaqutaannut ajoquseerujussuassaaq, taakkumi puitsit amiisa tunisaanerisa unitsinneqarnerannit suli atugarliortinneqassapput.

Aningaasaqarnermut ataatsimiititaliami ilaasortat Siumumeersut oqaatigissavaat qinnuteqaat Naalakkersuisut allattoqarfianit suliarineqareerluni Naalakkersuisunit nassiunneqarnissaanut Inatsisartuni partiit siulittaasuinit tamanit ataaserli minillugu akuerineqartoq. Naak Inatsisartunut qinersinissaq nalunaarutigineqareeraluartoq siuliami pineqartoq tunuliaqutaralugu Aningaasaqarnermut ataatsimiititaliami inatsisinut naapertuuttumik suliap suliarineqarsinnaanera Siumumit qularutissaasutut isigineqanngilaq.

Amerlanerussuteqartut kissaataat naapertorlugu suliamut aalajangiisoqassaaq.

**Aningaasaqarnermut ataatsimiititaliap aalajangiinera**

Naalakkersuisut inassuteqataannut Aningaasaqarnermut ataatsimiititaliami amerlanerussuteqartut isumminngillat.

Inussiarnersumik inuulluaqqusillunga

Augusta Salling  
Aningaasaqarnermut ataatsimiititaliami siulittaasoq